

Un rato di ora ey Tanta Dora

Con bai muchanan, un bon año pa boso, jen di bendicion. Con boso a pasa Pasco y Año Nobo? Boso a goza cu hopi dande? Boso sa dicon e cantadó di dande ta cu sombré na su man ora e ta canta? Antes no tabata pa tira placa den dje. Promenan aya hende homber tabata cana cu sombré semper y ta kita esaki pa saluda, caba ta drenta cas.

Dande tabata jega despues di mei anochi y e ora ey tur hende ta drumí. No tabata tin cuenta di keda lantá manera aworaki, p'esey nan ta canta: "Nos a bin pa saluda'bo", "Lanta 'riba ricibi'ele" y "Dande a jega na bo porta".

Tabata canta na porta será, si ta ricibi e Dande ta habri porta, si pa un o otro motibo, malesa o luto, no ta ricibi dande. Nan ta canta na e porta será y sigui pa un otro cas.

Ta canta e hendenan cu ta biba na e cas uno pa uno, y e ora ey bo ta tira placa den sombré. E jiu di mas chikito ta wordo cantá cu mas gracia manera: "Pret'i wowo di su Papachi" o "Perla fini di su Mamachi".

Sigur cu comemento di ham horná y hopi ayaka por a bruha e stoma, pero no ta nada, nos ta bai busca remedi di tera pa drech'é.

Tin un mata cu jama scobiyo. Esey ta pa si bo tin iritacion na stoma door di a come p.e. suls o

sanger jená cu hopi pika. Ta herbe e scobiyo y beb'é pa fresca. Ta ranca e mata den cunucu y ta pon'é seca na solo. Ta piki dos o tres taki, ta lab'é y ta pon'é herbe. Ora e awa bira color di té ta paga stoof, col'é cu un colado fini, y lag'é fria.

Ora e ta friu ta beb'é como awa. Si bo tin dolor di barica o barica los, ta kokolodé ta e remedi. E ta un mata berde cu ta floria manera un krans di flor chikito blanco. Bo ta ranca e mata y e rais bo ta lab'é bon labá y herb'é lag'é fria y beb'é. Despues di dos glas ja e barica a drecha. Luna di December tur hende ta druk cu preparacion pa Pasco. Curpa ta

cansa y no tin resistencia y pa corona obra awa ta stofia tambe den e temporada ey y e resultado ta griep. Wel, den bocht ey mes tin su remedi. Tebenki cu Tamarijn. Tebenki ta un mata berde cu foyo chikito y ta crese abao na tera y ta rama. Su flor ta chikito y geel. Ta herbe e tebenki seco o berde cu dos taki di mata di tamarijn y ta beb'é cayente y ayo griep.


Muchanan chikito cu tin keintura: un tiki azeta di coco na stoof, machica algun foyo di jerb'i hole blanco, pon'é den e azeta y un tiki louw ta hunta e curpa di e mucha y keintura ta kita unbes.

No ta tur ora mester bai dokter, nos tin hopi remedi di nos grandinan cu nos por usa y cu ta juda.

Muchanan te otro luna cu poder di Dios. Gosa bon cu carnaval...



Tanta Dora



Un mata di kokolodé



Chabalito

Number 5 - Año IV
Januari, 2002 - Afl. 2,=

